

၂ သက်သာလောနိတ် သက်သာလောနိတ် အသင်းတော်ဟို ပေါလုရဲ့ ဒုတိယပေးစာ နိဒါန်း

သက်သာလောနိတ် အသင်းတော်ဟို ပေါလုရဲ့ ဒုတိယ ပေးစာ အား တမန်တော် ပေါလု ရေးသားခဲ့အယ် (၁.၁)။ ခရစ်တော် မွေးဖွားပင်း ၅၁ ခုနှစ်ဝန်းကျင်တွင်၊ သက်သာ လောနိတ် ပထမပေးစာ ရေးသားပင်းနောက် မကြာမီ အချိန်တွင် ဟေစဟို ရေးခဲ့အယ်။ ပေါလုဟ သူရဲ့ ဒုတိယ သာသနာပြုခရီးတွင် တည်ထောင်ခဲ့သော သက်သာလော နိတ် အသင်းတော်ဟို ဟေစကို ရေးသောအခါ ကောရိန် မြို့တွင် ဆီနေဆဲ ဖြစ်အယ် (တ ၁၇.၁-၁၀)။ အဲအသင်း တော်ဟို ယုဒအချို့နဲ့ ဟေလသလူမျိုးများစွာဖြင့် ဖွဲ့စည်း ထားကျောန်း တမန်တော်လို့ရဲ့ လုပ်ဆောင်ချက်များကျမ်း တွင် ဖော်ပြထားအယ်။

သက်သာလောနိတ် အသင်းတော်ဟ နောက်ဆုံးသော အချိန် ကာလ နဲ့ ခရစ်တော် ရဲ့ ဒုတိယ ကြွလာ ခြင်း နဲ့ ပတ်သက်ပင်း အလေးထားကြအယ်၊ ပစကို ပေါလု ဟ သက်သာလောနိတ် အသင်းတော်ဟို သူရဲ့ စာ နေ စောင်လုံးတွင် ၎င်းအကျောန်းကို များစွာ ရေးခဲ့အယ်။

သက်သာလောနိတ် ဒုတိယ စာစောင်ရဲ့ ထက်ဝက်နီးပါးဟာ နောက်ဆုံး အချိန်ကာလများ ဖြစ်အယ်။ ပေါလုဟလည်း ပျင်းရိခြင်းကို မပြုရန် သတိပေးခဲ့အယ်။ လူတိုင်းဟာ ၎င်း လို့ရဲ့ စားဝတ်နေရေးအတွက် အလုပ်လုပ်သင့်အယ် (၃.၆-၁၀)။

အကျော့အရာ အကျဉ်းချုပ်

၁။ ပေါလုဟ သူနဲ့ သူရဲ့ အဖော်များဟို မိတ်ဆက်ပေးခြင်းဖြင့် စာဟို စတင်အယ် (၁.၁-၂)

၂။ အဲနောက်၊ သက်သာလောနိတ်မြို့ဆီ အသင်းတော်အတွက် ဘုရားသခင်ဟို ကျေးဇူးတင်ပင်း သူလို့ အတွက် ဆုတောင်းပေးအယ် (၁.၃-၁၂)

၃။ အခန်းကြီး ၂ တွင် ပေါလုဟ နောက်ဆုံးသော ကာလများအကျော့အရာဟို ပြောထားအယ် (၂.၁-၁၇)

၄။ အဲနောက်၊ သူဟာ ပျင်းရိခြင်းနဲ့ အလုပ်လုပ်ရန် လိုအပ်ကျော့အရာဟို ဆန့်ကျင် ပြောဆိုအယ် (၃.၁-၁၅)

၅။ ပေါလုဟ အသင်းတော်ဟို တဖန် နှုတ်ဆက်ခြင်းဖြင့် အပီးသတ်အယ် (၃.၁၆-၁၈)

¹ ပေါလု၊ သိလွာနဲ့ တိမောသေလို့ဟ —

ငါလို့ အဖ ဘုရားသခင်နဲ့ သခင် ယေရှု ခရစ်တော် နှိုက် တည်သော သက်သာလောနိတ်မြို့သား လို့ရဲ့ အသင်းတော်ဆေဟို နှုတ်ဆက်လိုက်ပါအယ်။

² ငါလို့ အဖ ဘုရားသခင်နဲ့ သခင် ယေရှု ခရစ်တော် ဆေမှ ကျေးဇူးတော်နဲ့ ငြိမ်သက်ခြင်းဟ နင်လို့နှိုက် ဆံ ပါစေသော။

ခရစ်တော် ကြွလာချိန်တွင် တရားစီရင်ခြင်း

³ ငါ့ညီအကိုလို့၊ ငါလို့ဟ နင်လို့အတွက် ဘုရားသခင် ဟို အမြဲတမ်း ကျေးဇူးတင်ရမယ်။ အေးလို့ လုပ်ခြင်းဟ လည်း မန်ကန်အယ်။ ပစာကို နင်လို့ရဲ့ ယုံကြည်ခြင်းဟ ရမ်းဆာ တိုးပွားယွေ့ အချင်းချင်းအပေါ်နှိုက် ထားသော နင်လို့တဦးချင်း ချစ်ခြင်းမေတ္တာဟလည်း ပွားများလျက် ဆံအယ်။

⁴ အေးကျောနဲ့ ငါလို့ဟ ဘုရားသခင်ရဲ့ အသင်းတော် များနှိုက် နင်လို့အကျောနဲ့ဟို ဝါကြွားကြအယ်။ နင် ကြုံတွေ့နေရသော နှိပ်စက် ညှဉ်းပန်းမှုနဲ့ ဆင်းရဲဒုက္ခ အားလုံးဟို နင်ဆက်လက်ခံနိုင်ရည်ဆံပင်း ယုံကြည်ပုံနဲ့ ပတ်သက်ယွေ့ ငါလို့ ကြွားဝါပါအယ်။

⁵ ဟေ အရာအားလုံးဟ ဘုရားသခင်ရဲ့ တရားစီရင် ခြင်း တရားဟ မန်ကန်ကျောနဲ့၊ ဘုရားသခင်ရဲ့နိုင်ငံတော် အတွက် ဆင်းရဲဒုက္ခခံရသော နင်လို့ဟ အဲနိုင်ငံတော်နဲ့ ထိုက်တန်သူများဖြစ်ကျောနဲ့ဟို ထင်ဆွားစေအယ်။

⁶ ဘုရားသခင်ဟ ဖြောင့်မတ်သော အမှု ဟို ပြုလိမ့်မယ်၊ နင်လို့ဟို ဒုက္ခရောက်စေသော သူလို့အပေါ် ဒုက္ခရောက်စေပင်း၊

၇ ဆင်းရဲဒုက္ခခံရသော နင်လို့အားလည်း ငါလို့လို့ မျိုး သက်သာရာရစေမယ်။ သခင် ယေရှုဟ တန်ခိုးကြီးသော ခေါင်းခင်တမန်များနဲ့ ခေါင်းခင်ဘုံမှ ပေါ်ထွန်းလာသောအခါ သူဟ အေးအရာများကို ပြုလုပ်လိမ့်မယ်။

၈ ဘုရားသခင်ဟို ငြင်းပယ်သောသူလို့နဲ့ ငါလို့ သခင်ယေရှုနဲ့ ပတ်သက်သော သတင်းကောင်းကို မနာခံသောသူလို့အား လောင်သောမီးဖြင့် အပစ်စီရင်လိမ့်မယ်။

၉ သူလို့ဟ ထာဝရပျက်စီးခြင်းရဲ့ ဒဏ်ကို ခံစားကြရပင် အဆင်မပြေမှုမျိုးကိုတော်နဲ့ ဘုန်းကြီးသောတန်ခိုးတော်မှ ဖယ်ဆွေးခြင်း ခံရကြလိမ့်မယ်။

၁၀ အေးနေ့နှိုက် ကိုယ်တော်ဟ မိမိရဲ့ သန့်ဆွင်းသူလို့အားဖြင့် ဘုန်းတော် ထင်ဆွေးစေခြင်းဟို ခံရပင် ငါလို့ရဲ့ သက်သေခံချက်ဟို နင်လို့ ယုံကြည်ကြတာ ဖြစ်ယွေ့ယုံကြည်သူအားလုံးလို့ရဲ့ အံ့ဩချီးမွန်းခြင်းဟို ခံရလိမ့်မယ်။

၁၁ အေးကျောနဲ့ ငါလို့ဟ နင်လို့အတွက် အမြဲဆုတောင်းပေးအယ်။ ငါလို့ရဲ့ ဘုရားသခင်ဟ နင်လို့အား အသက်ဆုငရန် ခေါ်လဲ့ အသက်နဲ့ ထိုက်တန်စေရန် ငါလို့ တောင်းဆိုအယ်။ ကိုယ်တော်ဟ နင်လို့ရဲ့ ကောင်းမြတ်သော အမှုဟို ပြုချင်သော စေတနာစိတ်ဆီသမျှနဲ့ ယုံကြည်ခြင်းနဲ့ဆိုင်သော လုပ်ဆောင်သော အမှုလို့ဟို တန်ခိုးတော်အားဖြင့် နင်လို့နှိုက် ပြောစုံပါစေသော။

၁၂ အေး နည်း အားဖြင့် ငါ လို့ ရဲ့ ဘုရားသခင် နဲ့

သခင်*ယေရှု ခရစ်တော်ရဲ့ ကျေးဇူးတော်အားဖြင့် ငါ
လို့ သခင် ယေရှုရဲ့ နာမတော်ဟု နှင်လို့နှိုက် ဘုန်းထင်
ဆွားစေခြင်းကို ခံရလျက်၊ နှင်လို့ဟုလည်း ကိုယ်တော်
နှိုက် ဘုန်းတော်ထင်ဆွားစေခြင်း ခံရမယ့်အကျော့နဲ့ ဖြစ်
အယ်။

2

မတရားသောသူ

¹ ညီအကိုလို့၊ ငါလို့ သခင် ယေရှု ခရစ်ရဲ့ ကြွလာခြင်း
အကျော့နဲ့ ကိုယ်တော်ဆေနှိုက် ငါလို့အတူတကွ စုဝေး
ခြင်း အကျော့နဲ့ ပတ်သက်ပင်း နှင်လို့ဟို ငါလို့ ပြော
အယ်။

² ပရောဖက်ပြုခြင်းဖြစ်စေ၊ ဟောပြောရာတွင်ဖြစ်စေ၊
ငါလို့ဟု ၎င်းကို စာတစောင်နှိုက် ရေးသားခြင်းဖြစ်စေ
သခင်ဘုရားရဲ့ နေ့ရောက်လာပီဟု ပြောဆိုကြသော်လည်း
နှင်ရဲ့ တွေးခေါ်မှုတွင် အလွယ်တကူ စိတ်ရှုပ်မခံစေမယ့်အ
ကျော့နဲ့ နှင်လို့အား ငါတောင်းပန်အယ်။

³ စသူကမှ နှင်လို့ဟို ပစာနည်းနဲ့မှ မလှည့်စားစေနဲ့။
အကျော့နဲ့မှာ ဖောက်ပြန်သင်းခွဲခြင်း ဦးရင်ဖြစ်ယွေ့၊ မ
တရားသောသူ တည်းဟူသော ပျက်စီးခြင်းရဲ့ သား မ
ပေါ်လာခင် အေးနေရက် ရောက်လာလိမ့်မယ် မဟုတ်။

⁴ သူဟု ဘုရားဟု ခေါ်သောအရာနဲ့ ကိုးကွယ်လဲ့အရာ
တိုင်းကို ဆန့်ကျင်ပင်း အရာအားလုံးလို့ထက် သူ့ကိုယ်သူ

* 1:12 ငါလို့ရဲ့ ဘုရားသခင်နဲ့ သခင်၊ အဲဟာမဟုတ်ရင် ငါလို့ရဲ့
ဘုရားသခင်နဲ့ သခင်။ 2:1 ၁ သက် ၄.၁၅-၁၇

ချီးမြှောက်မယ် ဖြစ်အယ်။ သူဟ ဘုရားရဲ့ ဗိမာန်တော် နှိုက်ပင် ဝင်ထိန်ပင်း သူ့ကိုယ်သူ ဘုရားသခင် ဖြစ်အယ် ဟု ကြွေးကြော်လိမ့်မယ်။

⁵ နင်လို့နဲ့ အတူဆီစဉ်ဟ ဟေအရာများဟို နင်လို့အား ငါပြောခဲ့တာဟို နင်လို့ မမှတ်မိကြသလော။

⁶ အဲအကျောန်းအရာများ အခု မဖြစ်အောင် တားထား တဲ့ အရာတခု ဆီသေးတယ်၊ အဲဟဟ ဘာလဲဆိုတာ နင်သိကြအယ်။ အချိန်တန်လျှင် အားနည်းသော အရာဟ ပေါ်လာလိမ့်မယ်။

⁷ အကျောန်းမှာ မတရားသောသူရဲ့ လျှို့ဝှက်သောအရာ ဟ အလုပ်ဖြစ်နေပေမဲ့ အခု တားဆီးထားသော သူဟ ဖ ယ်ဆွားခြင်း ခံရလဲ့အထိ တားဆီးလိမ့်မယ်။

⁸ အဲပင်းရင် မတရားသောအရာဟ ပေါ်လာပေမဲ့ သခင် ယေရှု ခရစ် ကြွလာသောအခါ ကိုယ်တော်ဟ သူ့ဟို မိမိ နှုတ်တော်မှ ထွက်သော လေအားဖြင့် ကွပ်မျက်ယွေ့ မိမိ ကြွလာခြင်းရဲ့ ရောင်ခြည်အားဖြင့် ပယ်ဖျက်လိမ့်မယ်။

⁹ မတရားသောသူဟ စာတန်ရဲ့ လုပ်ဆောင်မှုအားဖြင့် ရောက်ဆီလာမယ်ဖြစ်ယွေ့ အမျိုးမျိုးသော တန်ခိုး၊ နိမိတ် လက္ခဏာများ၊ လိမ်လည်ခြင်းနဲ့ဆိုင်သော အံ့ဩဖွယ်ရာ များဖြင့်လည်းကောင်း၊

¹⁰ အားပင်း ပျက်စီးခြင်းသို့ ရောက်သော သူလို့အပေါ် မတရားသော လှည့်စားမှု အမျိုးမျိုးကို အသုံးပြုလိမ့်

မယ်။ သူ့လို့ ပျက်စီးခြင်းကို ရောက်ရမဲ့အကျောန်းမှာ မိမိ
လို့ ကယ်တင်ခြင်း ခံရရန်အတွက် သမ္မာတရားအား ချစ်
ရမယ်ဟု ငြင်းပယ်ကြသောကျောန့် ဖြစ်အယ်။

¹¹ အေးကျောန့် အမားဟို သူ့လို့ယုံကြည်ကြစေရန်
ဘုရားသခင်ဟ လှည့်စားခြင်း တန်ခိုးဟို သူ့လို့ဆေဟို
စေလွှတ်အယ်။

¹² ရလဒ်အနေနဲ့ သမ္မာတရားဟို မယုံကြည်ဘဲ အပစ်
နှိုက် မွေ့လျော်သူတိုင်းဟ စီရင်ခြင်းဟို ခံရလိမ့်မယ်။

နင်ဟ ကယ်တင်ခြင်းအတွက် ရွေးချယ်ခံရခြင်း

¹³ သခင်ဘုရားချစ်သော ညီအကိုလို့၊ နင်လို့အတွက်
အချိန်တိုင်း ဘုရားသခင်ဟို ကျေးဇူးတင်ရမယ်။ အ
ကျောန်းမှာ ဘုရားသခင်ဟ နင့်အား သူရဲ့ သန့်ဆွ
င်းမြင့်မြတ်သော လူမျိုး ဖြစ်စေရန်နဲ့ သမ္မာတရားကို
ယုံကြည်ခြင်းအားဖြင့် နင့်အား ဝိညာဉ်တော်ရဲ့ တန်ခိုး
ဖြင့် ကယ်တင်ခြင်းဟို ရောက်မယ့် ဦးရင်ဆုံး*သူဖြစ်
ဘုရားသခင် ရွေးချယ်ခဲ့အယ်။

¹⁴ ငါလို့ ဟောပြောသော ဧဝံဂေလိတရားအားဖြင့်
ဘုရားသခင်ဟ နင်လို့ဟို ခေါ်ယွေ့၊ ငါလို့ သခင် ယေရှု
ခရစ်ရဲ့ ဘုန်းအသရေဟို နင်လို့ ရဆီစေရန်အတွက် ဖြစ်
အယ်။

* **2:13** ဦးရင်ဆုံး၊ တချို့ လက်ရေးမူကျမ်းများတွင် အစအဦးနှိုက်၊ ဟု
ပါဆီအယ်။

15 အေးကျောနဲ့ ငါ့ညီအကိုလို့ ခိုင်ခံ့စွာ ရပ်တည်ပင်း ငါလို့ရဲ့ ဝေငှခြင်းအားဖြင့် ဖြစ်စေ၊ စာအားဖြင့် ဖြစ်စေ ငါလို့သင်ပေးခဲ့တဲ့ သမ္မာတရားတွေကို စွဲကိုင်ထားလော့။

16 ငါလို့ရဲ့ သခင် ယေရှု ခရစ်တော် တတ်တိုင်းနဲ့ ငါလို့ဟို ချစ်ယွေ့ ကျေးဇူးတော်အားဖြင့် ထာဝရ နှစ်သိမ့်ခြင်းနဲ့ ကောင်းမြတ်သော မျှော်လင့်ခြင်းလို့ဟို ပေးသော ငါလို့အဖ ဘုရားသခင်ဟာ၊

17 နင်လို့ စိတ်နေလုံးဟို နှစ်သိမ့်ပေးယွေ့ ကောင်းသော စကားနဲ့ ကောင်းသောအမှု အားလုံးလို့နှိုက် နင်လို့ဟို ခိုင်ခံ့မြဲမြံပါစေသော။

3

ငါလို့အတွက် ဆုတောင်းပေးပါ

1 နောက်ဆုံး မှာ ငါ့ ညီ အကို လို့၊ သခင်ဘုရား ရဲ့ သတင်းစကားဟာ နင်လို့နှိုက် ဆီသလိုမျိုး လျင်မြန်စွာ ပြန့်ပွားပင်း ဂုဏ်အသရေ ဆီစေခြင်းငှာ ငါလို့အတွက် ဆုတောင်းပေးပါ။

2 ငါလို့ဟို ကောက်ကျစ်ယွေ့ ဆိုးညစ်သော လူလို့လက်မှ ကယ်တင်ခြင်း ခံရမဲ့အကျောနဲ့ ငါလို့အတွက်လည်း ဆုတောင်းပေးကြလော့၊ အကျောနဲ့မှာ လူအားလုံးဟာ သတင်းစကားဟို ယုံကြည်ကြတာ မဟုတ်။

3 အဲလိုလဲ ဘုရားသခင်ဟ သစ္စာဆိပ်ပင်း ကိုယ်တော်
ဟ နင့်ဟို ကြံ့ခိုင်စေယွေ့ ဆိုးညစ်သောသူဆေမှ ကွယ်ကာ
စောင့်ဆောက် လိမ့်မယ်။

4 အားပင်း သခင်ဘုရားဟ ငါလို့အား ယုံကြည်စိတ်ချမှု
ဟို ပေးအယ်၊ ငါလို့ဟ နင်လို့လုပ်နေတာ သေချာပင်း ငါ
လို့ပြောတဲ့အတိုင်း ဆက်လုပ်နေမှာ သေချာတယ်။

5 သခင်ဘုရားဟ နင်လို့ရဲ့ စိတ်နေလုံးကို ဘုရားသခင်
ရဲ့ ချစ်ခြင်းမေတ္တာနဲ့ ခရစ်တော်ရဲ့ သည်းခံခြင်းထဲဟို
ပို့ဆောင်ပါစေ။

အချောင်ခိုသူမဖြစ်ရန် သတိပေးခြင်း

6 ငါ့ညီအကိုလို့ ငါလို့ဆေမှ ခံယူရဆဲလဲ သွန်သင်ချက်
များဟို မလိုက်ဆောက်ဘဲ စည်းကမ်းမဲ့ အသက်ဆုင်
ဆောက်လှမ်းနေကြသော သူအားလုံးဟို ဆောင်ကြဉ်ကြ
ရန် ငါလို့ သခင် ယေရှု ခရစ်တော်ရဲ့ နာမတော်အားဖြင့်
နင်လို့ဟို ငါလို့ မိန့်မှာကြအယ်။

7 အကျောန်းမှာ ငါလို့ရဲ့ စံနမူနာကို နင်စလိုမျိုး လိုက်နာ
သင့်တာဟို နင်လို့တတ်တိုင်း သိသောကျောနဲ့ ဖြစ်အယ်။
နင်လို့နဲ့အတူဆီတုန်းဟ ငါလို့ ပစာမှ မလုပ်ခဲ့ဝူး၊

8 ငါလို့ဟ အခကြေးငွေမပေးဘဲ စသူရဲ့ အစာဟိုမှ
အလကား မစားပါ။ ဆန့်ကျင်ဘက်အားဖြင့် ငါလို့ဟ နင်
လို့တွင် စသူကိုမျှ ဝန်ထုပ်ဝန်ပိုး မဖြစ်စေရန် နေ့ညမပြတ်
ပင်ပန်းကြီးစွာ အားထုတ်ခဲ့ကြအယ်။

၉ ငါလို့ ဟောအရာဟို လုပ်ရခြင်းမှာ ငါလို့နှိုက် အခွင့် မဆီသောကျောနဲ့ မဟုတ်၊ ငါလို့ဟို အတုယူနိုင်ရန် ငါလို့ တတ်တိုင်း နင်လို့အား စံနမူနာပြုလိုသောကျောနဲ့သာ ဖြစ် အယ်။

၁၀ အကျောနဲ့မှာ ငါလို့ဟ နင်လို့နဲ့ အတူဆီစဉ်ပင်၊ “အလုပ် မလုပ်ချင်သောသူဟ မစားရ” ဟု ငါလို့ဟ နင် လို့ဟို ဟောစည်းကမ်းချက် ပေးတယ်။

၁၁ နင် လို့ တွင် အချို့သော သူလို့ဟ ပျင်းရိ ယွေ့ အလုပ်ရှုပ် မနေဘဲ သူတပါးကိစ္စနှိုက် ဝင်ရောက်စွတ်ဖက် သူများ ဖြစ်သောကျောနဲ့ ဖြစ်အယ်။

၁၂ အေးလို့သော သူလို့ဟ ကိုယ့်အစားအစာကိုယ် စား နိုင်ရန်အတွက် အေးဆေးတည်ငြိမ်စွာ အလုပ်လုပ်ကြ ရန် သခင် ယေရှု ခရစ်တော်နှိုက် ငါလို့ညွှန်ကြားလျက် တိုက်တွန်းနိုးဆော်ကြပါအယ်။

၁၃ အဲလိုလဲ ညီအကိုလို့၊ နင်လို့ဟ ကောင်းသောအမှုဟို ပြုရာနှိုက် စိတ်ပျက်အားလျော့ခြင်း မဆီကြနဲ့။

၁၄ တစုံတယောက်ဟ ဟောစာအားဖြင့် ငါလို့မှာကြား သောစကားဟို နားမထောင်ရင် အေးသူအား အဆုတ်ရ စေရန် သူ့ဟို မှတ်ထားလျက် သူနဲ့ မပေါင်းဖော်ကြနဲ့။

၁၅ အဲလိုလဲ သူ့ဟို ရန်သူလိုမျိုး မမှတ်ယူဘဲ ညီအကို ချင်း အလိုဆီသလိုမျိုး သူလို့ဟို သတိပေးကြလော့။

နောက်ဆုံး နှုတ်ဆက်စကား

¹⁶ အခုတွင် ငြိမ်သက်ခြင်းရဲ့ သခင်ဘုရား တတ်တိုင်း နှင်လိုအား အချိန်အခါခပ်သိမ်း ငြိမ်သက်ခြင်း ပေးသနား ပါစေသော။ သခင်ဘုရားဟ နှင်လိုအားလုံးနဲ့ အတူဆီပါ စေ။

¹⁷ ဟေ နှုတ်ဆက်စကားဟို ငါ ပေါလုတတ်တိုင်း ငါ့ လက်နဲ့ ရေးလိုက်ပါအယ်။ ဟေဟာဟ ငါ့စာအားလုံးတွင် ပါလဲ့ အမှတ်လက္ခဏာ ဖြစ်အယ်။ ဟေလိုမျိုးစာဟို ငါ ရေးအယ်။

¹⁸ ငါ့လို သခင် ယေရှု ခရစ်တော်ရဲ့ ကျေးဇူးတော်ဟ နှင်လိုအားလုံးနဲ့ အတူဆီပါစေသော။

ဓမ္မသစ်ကျမ်း နေ့ဘာသာစကား

Danu: ဓမ္မသစ်ကျမ်း နေ့ဘာသာစကား (Bible)

copyright © The Word for the World International

Language: (Danu)

Contributor: The Word for the World International

နေ ဓမ္မသစ်ကျမ်း

The New Testament in Danu Language

The Word for the word

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-01

PDF generated using Haiola and XeLaTeX on 1 May 2025 from source files dated 1 May 2025

8aba2da5-2a35-5ff6-9d27-1e96563449b2